

«Դերձակի դասը» Հայկական ժողովրդական հեքիաթ

Լինում է, չի լինում, մի կամակոր թագավոր է լինում: Եվ մի օր սա կանչում է իր երկրի բոլոր դերձակներին և հրամայում է իր համար մի այնպիսի վերմակ կարել, որ համապատասխանի իր հասակին ոչ երկար լինի, ոչ կարճ: Ոչ մի դերձակ չի կարողանում թագավորի հրամանը ճիշտ կատարել. բոլորի գլուխներն էլ կտրել է տալիս:

Օրերից մի օր թագավորի մոտ մի դերձակ է գալիս:

Թագավորն ապրած կենա, $\frac{3}{4}$ ասում է նա, — ես քո ուզած վերմակը կկարեմ: Ոչ երկար կլինի, ոչ կարճ:

Լա՛վ, — ասում է թագավորը, — իսկ եթե մի փոքր երկար կամ կարճ եղավ, իմացած լինես գլուխդ կտրել կտամ:

— Համաձայն եմ, թագավորն ապրած կենա, թե չկարողացա՝ գլուխս կտրիր:

Դերձակը գնում է մի վերմակ կարում, դիտմամբ էլ մի քիչ կարճ է անում: Տանում է դնում թագավորի առաջ, իսկ փեշի տակ էլ մի ճիպոտ է պահած լինում:

— Թագավորն ապրած կենա, $\frac{3}{4}$ ասում է դերձակը՝ գլուխ տալով, — քո ուզած վերմակը կարել եմ: Տես, կհավանե՞ս:

— Տեսնենք հասակիս հարմա՞ր է, թե ավել-պակաս է, — ասում է թագավորն ու պառկում թախտին, վերմակը քաշում է վրան: Վերմակը հազիվ ծնկներին է հասնում, ոտները լրիվ բաց են մնում: Դերձակն իսկույն փեշի տակից հանում է ճիպոտը և խփում թագավորի ոտքերին: Թագավորն անմիջապես ոտքերն իրեն է քաշում, թաքցնում վերմակի տակ:

— Թագավորն ապրած կենա, — ասում է դերձակը,— ոտքը իր վերմակի համեմատ պետք է մեկնի:

Կամակոր թագավորը, երբ լսում է դերձակի խելացի խորհուրն այլևս ոչինչ չի կարողանում ասել, նույնիսկ մեծամեծ նվերներ է տալիս իմաստուն դերձակին և ճանապարհի դնում: